



Broj: 02-04-56987-2/25
Sarajevo, 18.12.2025. godine

Na osnovu člana 26. i 28. stav (4) Zakona o Vladi Kantona Sarajevo („Službene novine Kantona Sarajevo“, broj: 36/14 - Novi prečišćeni tekst i 37/14 - Ispravka) Vlada Kantona Sarajevo, na **107.** sjednici održanoj **18.12.2025.** godine, donijela je

ZAKLJUČAK

1. Utvrđuje se prijedlog Zakona o usmjeravanju sredstava za pomoć u sanaciji klizišta prikupljenih po osnovu posebne naknade.
2. Predlaže se Skupštini Kantona Sarajevo da, u skladu sa članom 158. Poslovnika Skupštine Kantona Sarajevo, pretrese Zakon iz tačke 1. ovog zaključka po skraćenom postupku.
3. Ovaj zaključak stupa na snagu danom donošenja.

P R E M I J E R

Nihad Uk

Dostaviti:

1. Predsjedavajući Skupštine Kantona Sarajevo,
2. Skupština Kantona Sarajevo,
3. Zamjenici predsjedavajućeg Skupštine Kantona Sarajevo (3x),
4. Premijer Kantona Sarajevo,
5. Ministarstvo komunalne privrede, infrastrukture, prostornog uređenja, građenja i zaštite okoliša Kantona Sarajevo,
6. Evidencija,
7. A r h i v a.

Na osnovu člana 18. tačka b) Ustava Kantona Sarajevo („Službene novine Kantona Sarajevo”, br. 1/96, 2/96, 3/96, 16/97, 14/00, 4/01, 28/04, 6/13 i 31/17), Skupština Kantona Sarajevo na sjednici održanoj dana _____, donosi

PRIJEDLOG

ZAKON O USMJERAVANJU SREDSTAVA ZA POMOĆ U SANACIJI KLIZIŠTA PRIKUPLJENIH PO OSNOVU POSEBNE NAKNADE

Član 1. (Predmet)

Ovim zakonom utvrđuje se namjena i način usmjeravanja sredstava posebne naknade (u daljem tekstu: sredstva posebne naknade) prikupljenih po osnovu Odluke o legalizaciji građevina izgrađenih bez odobrenja za građenje i građevina privremenog karaktera („Službene novine Kantona Sarajevo”, br. 6/06, 18/07, 18/08, 35/12 i 51/15).

Član 2. (Gramatička terminologija)

Gramatička terminologija korištenja izraza ženskog ili muškog roda u ovom zakonu uključuje oba roda.

Član 3. (Namjena sredstava posebne naknade)

Sredstva posebne naknade Vlada Kantona Sarajevo (u daljem tekstu: Vlada) može usmjeriti na:

- a) sanaciju klizišta na području jedinica lokalne samouprave u Kantonu Sarajevo,
- b) sanaciju klizišta na području jedinica lokalne samouprave izvan Kantona Sarajevo ukoliko je isto uzrok štetnih posljedica nastalih na imovini Kantona Sarajevo ili uzrokuje štetne posljedice po živote, zdravlje i materijalna dobra stanovnika Kantona Sarajevo.

Član 4. (Postupak realizacije sredstava posebne naknade)

- (1) Sredstva posebne naknade usmjeravaju se prema Programu koji usvaja Vlada na prijedlog Ministarstva komunalne privrede, infrastrukture, prostornog uređenja, građenja i zaštite okoliša Kantona Sarajevo (u daljem tekstu: Ministarstvo) koji priprema Zavod za izgradnju Kantona Sarajevo po prethodno pribavljenim mišljenjima općinskih načelnika sa područja Kantona Sarajevo.
- (2) Program Vlade mora sadržavati detaljan opis projekta, procjenjene troškove, rokove izvršenja i nosioce aktivnosti te mora biti javno objavljen na službenoj internet stranici Vlade u roku od 15 dana od dana usvajanja.

Član 5.

(Izvor sredstava posebne naknade)

Sredstva posebne naknade obezbjeđena su u Budžetu Kantona Sarajevo na razdjelu 26010001 – Zavod za izgradnju Kantona Sarajevo, ekonomski kod 615100, subanalitika RAI005.

Član 6.

(Nadzor)

- (1) Nadzor nad primjenom ovog zakona vrši Ministarstvo, a kontrolu utroška sredstava posebne naknade vrši Ministarstvo finansija Kantona Sarajevo.
- (2) Vlada je obavezna jednom godišnje podnijeti Skupštini Kantona Sarajevo izvještaj o realizaciji Programa iz člana 4. ovog zakona, utrošenim sredstvima i ostvarenim ciljevima.

Član 7.

(Stupanje na snagu)

Ovaj zakon stupa na snagu osmog dana od dana objavljivanja u „Službenim novinama Kantona Sarajevo“.

Broj: _____/25
Sarajevo, _____ 2025. godine

Predsjedavajući Skupštine Kantona Sarajevo

Elvedin Okerić

I PRAVNI OSNOV

Pravni osnov za donošenje ovog zakona sadržan je u odredbama člana 18. tačka b) Ustava Kantona Sarajevo ("Službene novine Kantona Sarajevo", br. 1/96, 2/96 – Ispravka, 3/96 – Ispravka, 16/97, 14/00, 4/01, 28/04, 6/13 i 31/17) kojima je propisano da Skupština Kantona donosi zakone i druge propise u okviru nadležnosti, izuzev propisa koji su ovim Ustavom ili zakonom dati u nadležnost Vlade Kantona.

II RAZLOZI DONOŠENJA

Prema važećoj Odluci o legalizaciji građevina izgrađenih bez odobrenja za građenje i građevina privremenog karaktera ubiru se sredstva posebne naknade, ista se osim za zaštitu izvorišta voda i izradu planova prostornog uređenja mogu koristiti isključivo za sanaciju klizišta koja se nalaze na području Kantona Sarajevo. U praksi se, međutim, pokazalo da postoji aktivno i potencijalno opasno klizište na teritoriji koje se nalazi neposredno uz administrativnu granicu Kantona Sarajevo, a čije eventualno aktiviranje može ugroziti živote, zdravlje i imovinu stanovnika Kantona Sarajevo.

S obzirom na činjenicu da je svrha korištenja sredstava posebne naknade između ostalog sanacija klizišta s ciljem zaštite života i sigurnosti građana, ukazala se potreba za donošenjem propisa kako bi se omogućilo korištenje ovih sredstava i za sanaciju klizišta na području jedinica lokalne samouprave izvan Kantona Sarajevo ukoliko je isto uzrok štetnih posljedica nastalih na imovini Kantona Sarajevo ili uzrokuje štetne posljedice po živote, zdravlje i materijalna dobra stanovnika Kantona Sarajevo.

Ovaj zakon ne mijenja osnovnu namjenu sredstava, već proširuje obuhvat njihove primjene u cilju efikasnije i odgovornije upotrebe javnih resursa u situacijama koje zahtijevaju odgovorno djelovanje.

Shodno gore navedenom potrebno je da Skupština Kantona Sarajevo donese predloženi Zakon, po skraćenom postupku u skladu sa članom 158. Poslovnika Skupštine Kantona Sarajevo, obzirom da se ne radi o obimnom zakonu.

III PRAVNA RJEŠENJA

Član 1. Ovim članom definisan je predmet zakona i način usmjeravanja sredstava prikupljenih po osnovu posebne naknade.

Član 2. Ovim članom definiše se gramatička terminologija.

Član 3. Ovim članom definiše se da se sredstva posebne naknade mogu usmjeriti na sanaciju klizišta na području jedinica lokalne samouprave u Kantonu Sarajevo ili izvan Kantona Sarajevo ukoliko je isto uzrok štetnih posljedica nastalih na imovini Kantona Sarajevo ili uzrokuje štetne posljedice po živote, zdravlje i materijalna dobra stanovnika Kantona Sarajevo.

Član 4. Ovim članom definisano je da se sredstva posebne naknade usmjeravaju se prema Programu koji usvaja Vlada Kantona Sarajevo na prijedlog Ministarstva koji priprema Zavod za izgradnju Kantona Sarajevo po prethodno pribavljenim mišljenjima općinskih načelnika sa

područja Kantona Sarajevo. Dalje se definiše da Program mora biti javno objavljen na internet stranici Vlade u roku od 15 dana od dana usvajanja.

Član 5. Ovim članom definiše se da su sredstava posebne naknade obezbjeđena u Budžetu Kantona Sarajevo na razdjelu Zavod za izgradnju Kantona Sarajevo.

Član 6. Definiše da nadzor nad primjenom zakona vrši Ministarstvo, a da kontrolu utroška sredstava posebne naknade vrši Ministarstvo finansija. Vlada je obavezna jednom godišnje podnijeti Skupštini Kantona Sarajevo izvještaj o realizaciji Programa o utrošenim sredstvima i ostvarenim ciljevima.

Član 7. Definiše da zakon stupa na snagu osmog dana od dana objavljivanja u „Službenim novinama Kantona Sarajevo“.

IV FINANSIJSKA SREDSTVA

Za realizaciju ovog zakona nisu potrebna dodatna finansijska sredstva u budžetu Kantona Sarajevo.



Broj: 02-04-53087-16/25
Sarajevo, 13.11.2025. godine

Na osnovu člana 26. i 28. stav (4) Zakona o Vladi Kantona Sarajevo („Službene novine Kantona Sarajevo“, broj: 36/14 - Novi prečišćeni tekst i 37/14 - Ispravka) Vlada Kantona Sarajevo, na 102. sjednici održanoj 13.11.2025. godine, donijela je

ZAKLJUČAK

1. Prihvata se Informacija o poduzetim aktivnostima na sanaciji klizišta „Curine njive“ broj: 02/01-40-49833-24/25 od 12.11.2025. godine.
2. Zadužuje se Ministarstvo komunalne privrede, infrastrukture, prostornog uređenja, građenja i zaštite okoliša Kantona Sarajevo da pripremi tekst Zakona o usmjeravanju sredstava za pomoć u sanaciji klizišta prikupljenih po osnovu posebne naknade.
3. Ovaj zaključak stupa na snagu danom donošenja.



PO OVLASTENJU PREMIJERA

Ministrica Softić Kadenić Darja

Dostaviti:

1. Predsjedavajući Skupštine Kantona Sarajevo,
2. Zamjenici predsjedavajućeg Skupštine Kantona Sarajevo (3x),
3. Premijer Kantona Sarajevo,
4. Kabinet premijera Kantona Sarajevo,
5. Ministarstvo komunalne privrede, infrastrukture, prostornog uređenja, građenja i zaštite okoliša Kantona Sarajevo,
6. Evidencija,
7. Arhiva.



Adresa: Reisa Džemaludina Čauševića 1, 71 000 Sarajevo
Tel: + 387 (0) 33 562-000, Fax: + 387 (0) 33 562-076
Web: <http://vlada.ks.gov.ba>, E-mail: vlada@vlada.ks.gov.ba

1/1

Na osnovu člana 18. stav 1 tačka b. Ustava Kantona Sarajevo ("Službene novine Kantona Sarajevo", broj 1/96, 2/96, 3/96, 16/97, 14/00, 4/01 i 28/04) i člana 147. stav 5. i 170. stav 3. Zakona o prostornom uređenju ("Službene novine Kantona Sarajevo", broj 7/05), Skupština Kantona Sarajevo, na sjednici održanoj 16. februara 2006. godine, donijela je

ODLUKU

O LEGALIZACIJI GRAĐEVINA IZGRAĐENIH BEZ ODOBRENJA ZA GRAĐENJE I GRAĐEVINA PRIVREMENOG KARAKTERA

Član 1.

Ovom Odlukom reguliše se postupak, uvjeti i način legalizacije građevina i drugih izvedenih radova u prostoru izgrađenih bez odobrenja za građenje (u daljnjem tekstu: bespravne građevine i bespravni radovi), kuća za odmor izgrađenih bez odobrenja za građenje, rješavanje pravnog statusa građevina privremenog karaktera (u daljnjem tekstu: privremene građevine) i postupanje organa u slučajevima započete izgradnje građevina na području Kantona Sarajevo (u daljnjem tekstu: Kanton).

Član 2.

Pod legalizacijom, u smislu ove Odluke, podrazumijeva se donošenje rješenja o naknadnoj urbanističkoj saglasnosti, naknadnom odobrenju za građenje i naknadnoj upotrebnoj dozvoli, u skladu sa odredbama Zakona o prostornom uređenju ("Službene novine Kantona Sarajevo", broj 7/05) (u daljnjem tekstu: Zakon) i ovom Odlukom.

Član 3.

Bespravnim građevinama, u smislu ove Odluke, smatraju se građevine ili njihov dio izgrađene bez odobrenja za građenje, građevine u čijoj je izgradnji odstupljeno od odobrenja za građenje i građevine dograđene ili nadzidane bez odobrenja za građenje.

Izgrađenom građevinom, u smislu ove Odluke, smatra se građevina na kojoj su do dana stupanja na snagu ove Odluke izvedeni građevinski i instalaterski radovi u cjelini ili je završen dio građevine koji se može samostalno koristiti.

Građevina u čijoj je izgradnji odstupljeno od odobrenja za građenje u smislu ove Odluke, smatra se građevina čiji vlasnik posjeduje odobrenje za građenje, a protekao je rok za izmjenu odobrenja utvrđen članom 105. stav 2. Zakona, ili je zahtjev za izmjenu odbijen.

Građevinama dograđenim ili nadzidanim bez pravosnažnog odobrenja za građenje, u smislu ove Odluke, smatra se građevina upisana u zemljišnu knjigu, dograđena ili nadzidana bez odobrenja za građenje.

Bespravnim radovima, u smislu ove Odluke, smatraju se izvedeni radovi iznad ili ispod površine tla, kojima se privremeno ili trajno zauzima prostor ili mijenjaju postojeći uvjeti korišćenja tog prostora.

Član 4.

Građevine čija je izgradnja započeta do dana stupanja na snagu ove Odluke na koje se ne mogu primjeniti odredbe člana 3. ove Odluke rješavat će se po odredbama Zakona.

Član 5.

Bespravno izgrađena kuća za odmor, u smislu ove Odluke, smatra se kuća izgrađena od tvrdih materijala (zidani elementi, drvene oblovine ili prefabrikovani elementi) bez odobrenja za građenje, van zone gradskog građevinskog zemljišta.

Član 6.

Privremenim građevinama, u smislu ove Odluke, smatraju se građevine izgrađene na osnovu izdatog pravosnažnog odobrenja za građenje donijetog na osnovu člana 129. Zakona o prostornom uređenju ("Službeni list SR BiH", br. 9/87-Prečišćeni tekst, 23/88, 24/89, 10/90, 14/90, 15/90 i 14/91 i "Službeni list R BiH", br. 16/92, 13/94 i 20/95) i odredbi Zakona o uređenju prostora ("Službeni glasnik Republike Srpske", broj 84/02-Prečišćeni tekst).

Član 7.

Po ovoj Odluci vrši se legalizacija građevina iz čl. 3, 5. i 6. ove Odluke koje su izgrađene do dana stupanja na pravnu snagu iste.

Osnov za utvrđivanje da je objekat izgrađen do dana stupanja na snagu ove Odluke je:

- satelitski snimak Kantona Sarajevo iz 2001. godine sa dopunom iz 2004. godine,
- akti Urbanističko-građevinskih inspekcija u postupku vršenja nadzora zaključno sa danom stupanja na snagu ove Odluke,
- dokaz o izvršenom priključenju na komunalnu infrastrukturu.

Za građevine dograđene i nadzidane organ će pribavljati dokaze prema odredbama Zakona o upravnom postupku.

Član 8.

Zahtjev za donošenje rješenja o naknadnoj urbanističkoj saglasnosti, odobrenju za građenje i upotrebnoj dozvoli podnosi se općinskom načelniku (u daljnjem tekstu: Nadležni organ), bez obzira na površinu nelegalno izgrađene građevine.

Izuzetno od stava 1. ovog člana ukoliko se radi o građevinama koje su izgrađene na području dvije ili više općina u sastavu Grada zahtjev se podnosi gradonačelniku (u daljnjem tekstu: Nadležni organ).

Član 9.

Postupak legalizacije bespravno izgrađene građevine pokreće se po zahtjevu ovlaštenog lica (ovlaštenim licem, u smislu ove Odluke, smatra se graditelj bespravno izgrađene građevine, vlasnik bespravno izgrađene građevine ukoliko on nije bio graditelj a vlasništvo dokazuje kupoprodajnim ugovorom na koji je plaćen porez na promet nekretnina) ili lice koje je nekretninu steklo na drugi zakonom propisan način.

Član 10.

Zahtjev za donošenje rješenja o naknadnoj urbanističkoj saglasnosti iz čl. 3, 5. i 6. ove Odluke može se podnijeti u roku od dvanaest mjeseci od dana stupanja na snagu iste.

Član 11.

Uz zahtjev za donošenje rješenja o naknadnoj urbanističkoj saglasnosti prilaže se:

- kopija katastarskog plana;
- zemljišnoknjižni izvadak;
- ažurna geodetska podloga, sa ucrtanom građevinom na istoj, izrađena od strane ovlaštene organizacije samo za uže gradsko područje;
- tlocrt objekta (u dva primjerka) sa najmanje četiri fotografije sa datumom, izuzev ako se radi o zonama iz člana 15. stav 3. ove Odluke, kada je potrebno dostaviti idejno rješenje sa najmanje četiri fotografije sa datumom.

Član 12.

Uz zahtjev za donošenje rješenja o naknadnom odobrenju za građenje prilaže se:

- kopija pravosnažnog rješenja o naknadnoj urbanističkoj saglasnosti;
- izvod iz katastra za pripadajuću građevinsku parcelu;
- dokaz o regulisanim troškovima utvrđenim kroz izdato rješenje o naknadnoj urbanističkoj saglasnosti;
- dokaz o pravu vlasništva ili pravu korišćenja zemljišta radi građenja odnosno pravu građenja;
- projekat izvedenog stanja urađen na nivou Glavnog projekta, uključujući i radove koje treba izvesti,
- izvještaj o geomehaničkom i inženjersko-geološkim karakteristikama tla, ukoliko je tako propisano u rješenju o urbanističkoj saglasnosti;
- saglasnosti pribavljene na projektnu dokumentaciju.

Kao dokaz o regulisanim troškovima naknade za pogodnost - renta, za kategorije iz Zakona o dopunskim pravima boraca-branitelja BiH ("Službene novine Kantona Sarajevo", br. 2/02, 28/03, 15/05 i 22/05), smatrat će se akt Ministarstva za boračka pitanja Kantona Sarajevo o preuzimanju obaveze izmirenja iste.

Dinamika isplate naknade iz prethodnog stava ne može biti duža od 5 godina od dana utvrđivanja obaveze plaćanja.

Rješenje o naknadnom odobrenju za građenje dostavlja se Ministarstvu prostornog uređenja i zaštite okoliša - Odjeljenje za dokumentaciju, nadležnoj poreznoj upravi, Zavodu za izgradnju Kantona Sarajevo i Zavodu za planiranje razvoja Kantona Sarajevo.

Član 13.

Legalizacija građevina ne može se izvršiti za građevine koje su izgrađene:

1. u zonama posebne namjene
2. na rezervisanim površinama
3. u zonama zaštitnih područja, I i II zaštitne zone izvorišta vode za piće, osim ako se planskim dokumentom drugačije ne utvrdi kao i za objekte izgrađene bez odobrenja za građenje prema satelitskom snimku iz 2001. godine uz obaveznu općine da provede aktivnosti i izgradi adekvatnu komunalnu infrastrukturu
4. u zonama saobraćajne i energetske infrastrukture, u pojasevima definisanim Urbanističkim planom Grada Sarajeva za period 1986. do 2015. godine ili regulacionim planom
5. u zonama vodne infrastrukture
6. u zonama rudnog polja i eksploatacije
7. u zonama sporta, rekreacije i zaštitnog zelenila
8. na komunalnim građevinama
9. u zonama klizišta
10. na poljoprivrednom zemljištu od 1. do 4. bonitetne kategorije, a čiji stepen izgrađenosti je manji od 50% ili dok se za to područje ne donese odgovarajući prostorni-planski dokument.

Član 14.

Nadležni organ će legalizovati bespravno izgrađenu građevinu ukoliko ista zadovoljava zahtjeve odgovarajućeg prostorno-planskog dokumenta predviđenog Zakonom.

Član 15.

Izuzetno od člana 14. ove Odluke u slučajevima odstupanja od planskog dokumenta ili odobrenih gabarita bespravno izgrađena građevina se može legalizovati ukoliko Nadležni organ analizom lokacije utvrdi da postoje prostorne mogućnosti, da izvedeni radovi nisu smetnja postojećim susjednim građevinama i da je predmetna izgradnja u skladu sa postojećom izgradnjom na lokalitetu.

U vođenju postupka Nadležni organ je dužan izvesti dokaze prvenstveno vodeći računa o distancama predmetne izgradnje od granica parcele i susjednih građevina kao i izgrađenoj spratnosti. U analizi lokacije i utvrđivanju svih bitnih činjenica organ može pribaviti mišljenje Zavoda za planiranje razvoja Kantona Sarajevo.

Ukoliko se radi o zonama prirodnog i graditeljskog naslijeđa Nadležni organ je dužan zatražiti mišljenje od strane Zavoda za planiranje razvoja Kantona Sarajevo i Kantonalnog zavoda za zaštitu kulturno-historijskog i prirodnog naslijeđa Sarajevo.

Član 16.

Izuzetno od odredbi člana 14. ove Odluke Nadležni organ će legalizovati bespravno izgrađenu građevinu koja se nalazi na prostoru za koji nije donesen odgovarajući prostorno-planski dokument koji je Zakonom propisan kao osnova za donošenje urbanističke saglasnosti pod uvjetom:

1. da se nalazi na zemljištu koje se može utvrditi kao građevinsko prema pribavljenom mišljenju Zavoda za planiranje razvoja Kantona Sarajevo, a na osnovu odgovarajućih studija koje se rade u okviru izrade Prostornog plana Kantona Sarajevo i ako se
2. ne nalazi u zonama navedenim u članu 13. ove Odluke

U slučaju iz prethodnog stava Općina će za navedena područja donijeti program minimalnog opremanja zemljišta (neće se raditi regulacioni plan) što uključuje obezbjeđenje saobraćajnog pristupa, snabdijevanje vodom i rješavanje odvodnje otpadnih voda, prvenstveno kanalizacionim sistemom, te snabdijevanje električnom energijom.

Realizaciju programa minimalnog opremanja zemljišta provodi općina paralelno sa postupkom legalizacije građevina a po osnovu naplate troškova uređenja.

Član 17.

Legalizacija građevina na područjima gdje je odgovarajućim odlukama utvrđen režim zabrane građenja vrši se na osnovu utvrđenog nacrtu plana, provedene javne rasprave i mišljenja Zavoda za planiranje razvoja KS ukoliko odlukom nije izričito zabranjena legalizacija.

Član 18.

U postupku legalizacije, a prije donošenja naknadnog odobrenja za građenje, vlasnik građevine plaća općini naknadu za dodijeljeno zemljište, naknadu za pogodnost lokacije - rentu i naknadu za uređenje građevinskog zemljišta i naknadu za promjenu namjene poljoprivrednog zemljišta ukoliko se radi o poljoprivrednom zemljištu, koja se utvrđuje u skladu sa važećim zakonskim propisima (Zakon o građevinskom zemljištu odnosno Odlukom Općinskog vijeća o utvrđivanju visina naknade i Zakona o poljoprivrednom zemljištu) kao i posebnu naknadu koja se utvrđuje ovom Odlukom.

Posebnu naknadu, u svakom konkretnom slučaju, uvrđuje Nadležni organ, a ista se uplaćuje Zavodu za izgradnju Kantona Sarajevo.

Sredstva prikupljena iz posebnih naknada usmjeravaju se prema Programu koji usvaja Vlada Kantona, po prethodno pribavljenim mišljenjima općinskih načelnika, za slijedeće namjene:

- zaštitu izvorišta vode za piće
- sanacije klizišta na području Kantona Sarajevo
- izradu provedbeno - planske dokumentacije

Ukoliko bespravno izgrađena građevina ispunjava uvjete za legalizaciju iz ove Odluke Nadležni organ će pozvati podnosioca zahtjeva da uz zahtjev za donošenje naknadnog odobrenja za građenje dostavi dokaz da su plaćene propisane naknade.

Ukoliko podnosilac zahtjeva za legalizaciju ne dostavi dokaz iz prethodnog stava, odbit će se zahtjev za donošenje naknadnog odobrenja za građenje.

Član 19.

Za legalizaciju bespravno izgrađenih građevina plaća se naknada za uređenje gradskog građevinskog zemljišta i renta u skladu sa odredbama Zakona o građevinskom zemljištu, posebna naknada utvrđena ovom Odlukom kao i naknada za promjenu namjene poljoprivrednog zemljišta ukoliko se radi o poljoprivrednom zemljištu.

Član 20.

Za legalizaciju bespravno izgrađene građevine čija je ukupna korisna površina (stambenog, poslovnog i proizvodnog prostora) do 100m², odnosno do 200 m² za podnosioca zahtjeva koji spadaju u kategorije iz člana 1. Zakona o dopunskim pravima boraca-branitelja BiH ("Službene novine Kantona Sarajevo", br. 2/02, 28/03, 15/05 i 22/05), ne plaća se posebna naknada.

Za bespravno izgrađene građevine čija je ukupna korisna površina veća od 100 m² odnosno 200 m² plaća se posebna naknada za svaki naredni m² korisne površine na slijedeći način:

1. Prva zona 100KM/ m²
2. Druga zona 80 KM/ m²
3. Treća zona 50 KM/ m²
4. Četvrta zona 30 KM/ m²
5. Peta zona 20 KM/ m²
6. Šesta zona 10KM/ m²

b) Za legalizaciju bespravno dograđenih ili nadzidanih građevina bez prvosnažnog odobrenja za građenje čija ukupna površina sa matičnom građevinom ne prelazi 100 m² odnosno 200 m² ne plaća se posebna naknada, a za slučajeve gdje prelazi 100 m² odnosno 200 m² plaća se posebna naknada utvrđena u stavu 2.a) ovog člana.

c) Za bespravno izgrađene kuće za odmor plaća se posebna naknada u iznosu kako slijedi:

1. do 50 m² neto korisne površine iznos od 1.000,00 KM
2. preko 50 m² neto korisne površine za svaki dodatni kvadratni metar plaća se po 30 KM.

Član 21.

Privremene građevine iz člana 6. ove Odluke mogu dobiti status građevina stalnog karaktera ukoliko ispunjavaju uvjete propisane ovom Odlukom na isti način kao bespravno izgrađene građevine.

Privremene građevine koje se ne mogu legalizovati u skladu sa ovom Odlukom, a imaju pravosnažna odobrenja za građenje, mogu se zadržati do privođenja zemljišta krajnjoj namjeni, a prema odredbi člana 170. stav 1. Zakona, kada se moraju ukloniti na zahtjev nadležne službe. Vlasnici ovih građevina imaju pravo na naknadu u vrijednosti građevinskih radova i instalacija prema izdatom odobrenju za građenje, a na osnovu procjene sudskog vještaka angažovanog od strane općine, u momentu privođenja zemljišta krajnjoj namjeni.

Za građevine iz stava 2. ovog člana do privođenja zemljišta krajnjoj namjeni, na zahtjev vlasnika građevine Nadležni organ donosi rješenje o njenom zadržavanju za svaku kalendarsku godinu.

Za građevine iz prethodnog stava Nadležni organ u momentu privođenja zemljišta krajnjoj namjeni donosi rješenje kojim se utvrđuje da je privremeni rok korištenja istekao, da je građevina u smislu odredbi Zakona bespravna i iznos naknade koji pripada vlasniku, koji snosi općina.

Za građevine iz prethodnog stava postupak uklanjanja provodi nadležna inspeksijska služba.

Član 22.

Kuće za odmor iz člana 5. ove Odluke ne mogu se legalizovati ukoliko su izgrađene u slijedećim zonama:

- a. u I i II vodozaštitnoj zoni,
- b. u zonama klizišta i
- c. u zaštitnim koridorima saobraćajne i komunalne infrastrukture u pojasevima definisanim Urbanističkim planom Grada Sarajeva za period 1986. do 2015. godine ili regulacionim planom.

Član 23.

U postupcima koji se vode po osnovu ove Odluke primjenjivat će se odredbe Zakona o upravnom postupku.

Član 24.

Nadležna služba za inspeksijske poslove donijet će rješenje o rušenju bespravno izgrađene građevine ukoliko:

1. ovlašćeno lice ne podnese zahtjev za donošenje naknadnog rješenja u roku propisanom ovom Odlukom
2. zahtjev bude odbijen ili odbačen, a protiv njega nije uložena žalba ili pokrenut upravni spor odnosno kada po istom budu iskorištena sva redovna pravna sredstva.

Postupak rušenja bespravne građevine sprovest će se u skladu sa važećim propisom.

Član 25.

Nadležni organ će sačiniti evidenciju bespravno izgrađenih građevina za koje bude izdato rješenje o legalizaciji u skladu sa odredbama ove Odluke i podatke kvartalno sistematizovati i dostavljati ovom Ministarstvu.

Član 26.

Nakon stupanja na snagu ove Odluke Kanton Sarajevo, Grad Sarajevo i općine potpisat će Protokol o suzbijanju bespravne gradnje.

Član 27.

Ova Odluka stupa na snagu osmog dana od dana objavljivanja u "Službenim novinama Kantona Sarajevo",

Broj 01-05-4362/06
16. februara 2006. godine
Sarajevo

Predsjedavajući
Skupštine Kantona Sarajevo
Meliha Alić, s. r.

Na osnovu člana 18. stav 1. tačka b. Ustava Kantona Sarajevo ("Službene novine Kantona Sarajevo", broj 1/96, 2/96, 3/96, 16/97, 14/00, 4/01 i 28/04) i čl. 147. stav 5. i 170. stav 3. Zakona o prostornom uređenju ("Službene novine Kantona Sarajevo", broj 7/05), Skupština Kantona Sarajevo, na sjednici održanoj 24. maja 2007. godine donijela je

ODLUKU

O IZMJENAMA I DOPUNAMA ODLUKE O LEGALIZACIJI GRAĐEVINA IZGRAĐENIH BEZ ODOBRENJA ZA GRAĐENJE I GRAĐEVINA PRIVREMENOG KARAKTERA

Član 1.

U članu 6. Odluke o legalizaciji građevina izgrađenih bez odobrenja za građenje i građevina privremenog karaktera ("Službene novine Kantona Sarajevo", broj 6/06), (u daljnjem tekstu: Odluka), brišu se riječi: "člana 129."

Član 10. Odluke mijenja se i glasi:

"Član 10.

Zahtjev za donošenje rješenja o naknadnoj urbanističkoj saglasnosti iz čl. 3, 5. i 6. ove Odluke može se podnijeti do 01.10.2007. godine."

Član 3.

Blagovremenim se smatraju i zahtjevi podneseni od dana 24.02.2007.godine do dana stupanja na snagu ove Odluke.

Član 4.

Ova Odluka stupa na snagu danom objavljivanja u "Službenim novinama Kantona Sarajevo".

Broj 01-05-15635/07
24. maja 2007. godine
Sarajevo

Predsjedavajući
Skupštine Kantona Sarajevo
mr. Denis Zvizdić, s. r.

Na osnovu člana 18. stav 1. tačka b. Ustava Kantona Sarajevo ("Službene novine Kantona Sarajevo", br. 1/96, 2/96-Isppravka, 3/96-Isppravka, 16/97, 14/00, 4/01 i 28/04) i čl. 147. stav 5. i 170. stav 3. Zakona o prostornom uređenju ("Službene novine Kantona Sarajevo", broj 7/05), Skupština Kantona Sarajevo, na sjednici održanoj 28. maja 2008. godine, donijela je

ODLUKU

O IZMJENAMA I DOPUNAMA ODLUKE O LEGALIZACIJI GRADEVINA IZGRAĐENIH BEZ ODOBRENJA ZA GRADENJE I GRADEVINA PRIVREMENOG KARAKTERA

Član 1.

U članu 3. u stavu 1. Odluke o legalizaciji građevina izgrađenih bez odobrenja za građenje i građevina privremenog karaktera ("Službene novine Kantona Sarajevo", br. 6/06 i 18/07), (u daljnjem tekstu: Odluka), iza riječi: "nadzidane bez odobrenja za građenje" dodaju se riječi:

"te građevine izgrađene do 1992. godine koje nisu uslovne za stanovanje - korišćenje, zbog oštećenja izazvanih ratnim dejstvima".

Član 2.

U članu 9. Odluke dodaje se novi stav 2. koji glasi:

"Ovlašteno lice u smislu ove Odluke je i graditelj bespravno izgrađene građevine na građevinskom zemljištu u državnoj svojini koji može ostvariti prava iz člana 61. Zakona o građevinskom zemljištu Federacije Bosne i Hercegovine ("Službene novine Federacije BiH", br. 25/03, 16/04 i 67/05)."

Član 3.

U članu 10. Odluke riječi: "01. 10. 2007. godine" zamjenjuju se riječima: "31.12.2008. godine".

Član 4.

U članu 11. alineja 4. ove Odluke mijenja se i glasi:

"- tlocrt objekta (u dva primjerka), izuzev ako se radi o zonama iz člana 15. stav 3. ove Odluke kada je potrebno dostaviti idejno rješenje."

Član 5.

U članu 12. Odluke iza stava 2. dodaje se stav 3. koji glasi:

"Dokaze o ostvarivanju prava po ovom osnovu pribavlja organ po službenoj dužnosti".

Dosadašnji st. 3. i 4. postaju st. 4. i 5.

Član 6.

U članu 17. Odluke dodaje se stav 2 koji glasi:

"Nadležni organ će prekinuti postupak legalizacije građevina, za koje je donesena odluka o pristupanju izradi odgovarajućeg planskog dokumenta, do sticanja uslova iz stava 1. ovog člana."

Član 7.

U članu 20. stav 2. pod a) tačka 6. iza riječi: "Šesta zona" dodaju se riječi: "i ostale zone".

Član 8.

U članu 22. tačka c. iza riječi: "definisanim" dodaju se riječi: "Prostornim planom Kantona Sarajevo za period od 2003. do 2023. godine,".

Član 9.

Iza člana 26. dodaje se novi član 26.a koji glasi:

"Član 26. a.

Blagovremenim se smatraju svi zahtjevi podneseni od dana stupanja na snagu Odluke ("Službene novine Kantona Sarajevo", broj 6/06) do 31. 12. 2008. godine."

Član 10.

Ova Odluka stupa na snagu osmog dana od dana objavljivanja u "Službenim novinama Kantona Sarajevo".

Broj 01-23-19091/08
28. maja 2008. godine
Sarajevo

Predsjedavajući
Skupštine Kantona Sarajevo
dr. Denis Zvizdić, s. r.



SLUŽBENE NOVINE KANTONA SARAJEVO

Godina XVII – Broj 35

Srijeda, 18. jula 2012. godine
SARAJEVO

ISSN 1512-7052

KANTON SARAJEVO

Skupština Kantona Sarajevo

Na osnovu člana 18. stav 1. tačka b) Ustava Kantona Sarajevo ("Službene novine Kantona Sarajevo", br. 1/96, 2/96, 3/96, 16/97, 14/00, 4/01 i 28/04), Skupština Kantona Sarajevo, na sjednici održanoj dana 18.07.2012. godine, donijela je

ODLUKU

O DOPUNAMA ODLUKE O USVAJANJU PROJEKTA "OPSADA I ODBRANA SARAJEVA 1992. - 1995. GODINE"

I

U Odluci o usvajanju Projekta "Opsada i odbrana Sarajeva 1992.-1995.godine" ("Službene novine Kantona Sarajevo", br. 9/06 i 15/07), u tački II dodaje se nova podtačka 11. koja glasi:

"11. Podprojekat stavljanja u funkciju i preuređenja objekta restorana "Kon-Tiki" ("Kod Sonje") u spomen obilježje - Muzej stradanja građana Bosne i Hercegovine, koji bi podsjećao na događaje u periodu 1992.-1995.godine."

II

U tački IV dodaje se nova podtačka 1.11 koja glasi:

"1.11 Podprojekat stavljanja u funkciju i preuređenja objekta restorana "Kon-Tiki" ("Kod Sonje") u spomen obilježje - Muzej stradanja građana Bosne i Hercegovine, koji bi podsjećao na događaje u periodu 1992.-1995.godine."

Nosilac aktivnosti: Ministarstvo za boračka pitanja Kantona Sarajevo, Zavod za izgradnju Kantona Sarajevo, Fond Memorijala Kantona Sarajevo i Općina Vogošća."

III

Ova Odluka stupa na snagu danom objavljivanja u "Službenim novinama Kantona Sarajevo".

Broj 01-05-22358/12
18. jula 2012. godine
Sarajevo

Predsjedavajuća
Skupštine Kantona Sarajevo
Prof. dr. Mirjana Malić, s. r.

Na osnovu člana 18. stav 1. tačka b) Ustava Kantona Sarajevo ("Službene novine Kantona Sarajevo", br. 1/96, 2/96, 3/96, 16/97, 14/00, 4/01 i 28/04) i čl. 147. stav 5. i 170. stav 3. Zakona o prostornom uređenju ("Službene novine Kantona Sarajevo", broj 7/05), Skupština Kantona Sarajevo, na sjednici održanoj dana 18.07.2012. godine, donijela je

ODLUKU

O IZMJENAMA I DOPUNAMA ODLUKE O LEGALIZACIJI GRADEVINA IZGRADENIH BEZ ODOBRENJA ZA GRAĐENJE I GRAĐEVINA PRIVREMENOG KARAKTERA

Član 1.

U Odluci o legalizaciji građevina izgrađenih bez odobrenja za građenje i građevina privremenog karaktera ("Službene novine Kantona Sarajevo", br. 6/06, 18/07 i 18/08), član 4. mijenja se i glasi:

Član 4.

Građevine čija je izgradnja započeta do 30.06.2012. godine, na koje se ne mogu primijeniti odredbe člana 3. ove Odluke rješavat će se po odredbama Zakona, uz obavezu plaćanja posebne naknade.

Za započete radove plaća se posebna naknada na način utvrđen u članu 20. ove Odluke".

Član 2.

U članu 7. stav 1. mijenja se i glasi:

"Po ovoj Odluci vrši se legalizacija građevina iz čl. 3., 5. i 6. ove Odluke koje su izgrađene do 30. 06. 2012. godine."

U stavu 2. dodaje se alineja 4. koja glasi:

" i drugi dokazi koje stranka predloži, a organ može utvrditi kao vjerodostojne."

Član 3.

Član 10. mijenja se i glasi:

Član 10.

Zahtjev za donošenje rješenja o naknadnoj urbanističkoj saglasnosti iz čl. 3., 5. i 6. ove Odluke može se podnijeti do 31. 12. 2012. godine."

Član 4.

U članu 12. u stavu 2. iza riječi: "branitelja BiH" brišu se riječi: "("Službene novine Kantona Sarajevo", br. 2/02, 28/03, 15/05 i 22/05)", a dodaju se riječi: "("Službene novine Kantona Sarajevo", broj 9/07-prečišćeni tekst i br. 7/08, 33/08, 3/12 i 18/12)."

Član 5.

U članu 16. u stavu 1. brišu se riječi:

" Izuzetno od odredbi člana 14. ove Odluke"

Član 6.

U članu 18. u stavu 1. iza riječi: "legalizacije", dodaju se riječi: "kao i za započete radove".

U stavu 3. dodaje se alineja 4. koja glasi:
"- troškove provođenja ove Odluke"

Član 7.

U članu 19. iza riječi "građevina", dodaju se riječi: "kao i za započete radove".

Član 8.

U članu 20. u stavu 1. iza riječi: "branitelja BiH" brišu se riječi: "(\"Službene novine Kantona Sarajevo\", br. 2/02, 28/03, 15/05 i 22/05)", a dodaju se riječi: "(\"Službene novine Kantona Sarajevo\", broj 9/07 - Prečišćeni tekst i br. 7/08, 33/08, 3/12 i 18/12)."

U stavu 2. iza riječi: "građevine" dodaju se riječi: "kao i za započete radove".

Član 9.

U članu 24. u stavu 1. tačka 1. iza riječi: "rješenja", brišu se riječi: "u roku propisanom ovom Odlukom", a dodaju se riječi: "do 31. 12. 2012. godine".

Član 10.

Član 26. a. mijenja se i glasi:

"Član 26. a.

"Blagovremenim se smatraju svi zahtjevi podneseni od dana stupanja na snagu Odluke (\"Službene novine Kantona Sarajevo\", br. 6/06, 18/07 i 18/08) do 31. 12. 2012. godine."

Član 11.

Ovlašćuje se Zakonodavno-pravna komisija Skupštine Kantona Sarajevo da utvrdi prečišćeni tekst ove Odluke u roku od 30 dana od dana objavljivanja u "Službenim novinama Kantona Sarajevo".

Član 12.

Ova Odluka stupa na snagu narednog dana od dana objavljivanja u "Službenim novinama Kantona Sarajevo".

Broj 01-05-22359/12
18. jula 2012. godine
Sarajevo

Predsjedavajuća
Skupštine Kantona Sarajevo
Prof. dr. Mirjana Malić, s. r.

OPĆINA HADŽIĆI

Općinsko vijeće

Na osnovu člana 68. stav 1. i 2. Zakona o vodama ("Službene novine Federacije BiH", broj 70/06), člana 42. stav 1. i 2. Zakona o vodama Kantona Sarajevo ("Službene novine Kantona Sarajevo", broj 18/10), Pravilnika o uslovima za određivanje zona sanitarne zaštite i zaštitnih mjera za izvorista voda koja se koriste ili se planiraju koristiti za piće ("Službene novine Federacije BiH", broj 51/02) i člana 24 Statuta Općine Hadžići ("Službene novine Kantona Sarajevo", broj 15/09) i člana 87. Poslovnika Općinskog vijeća Hadžići ("Službene novine Kantona Sarajevo", broj 15/09), Općinsko vijeće Hadžići, na svojoj 36. sjednici održanoj dana 12.07.2012. godine, donosi

ODLUKU

O ZONAMA SANITARNE ZAŠTITE I ZAŠTITNIM
MJERAMA ZA IZVORIŠTA PITKE VODE BUNARA B-1
COCA-COLA HBC B-H D.O.O. SARAJEVO

I. OPĆE ODREDBE

Član 1.

(Predmet Odluke)

- (1) Ovom Odlukom utvrđuju se granice zone sanitarne zaštite, zaštitne mjere, izvori i način finansiranja zaštitnih mjera za izvorista pitke vode bunara B-1 Coca-Cola HBC B-H d.o.o. Sarajevo (u daljem tekstu: izvorista bunara B-1 Coca-Cola) i kaznene odredbe za povredu odredaba ove Odluke.
- (2) Ova odluka donosi se u cilju zaštite pitkih podzemnih voda koje se koriste za potrebe tehnološkog procesa proizvodnje u pogonu Coca-Cola HBC B-H d.o.o. Sarajevo (u daljem tekstu: Coca-Cola) od svih vidova zagađenja i štetnih uticaja koji mogu nepovoljno djelovati na zdravstvenu ispravnost vode za piće ili na izdašnost izvorista.

Član 2.

(Razlozi za donošenje Odluke)

Odredbe Odluke o zonama sanitarne zaštite i zaštitnim mjerama za izvorista bunara B-1 Coca - Cola (u daljem tekstu: Odluka) odnose se na zaštitu izvorista pitke vode bunara B-1 Coca - Cola iz kojeg se vrši eksploatacija vode za potrebe tehničko-tehnološkog procesa proizvodnje u pogonu Coca-Cola.

II. ZAŠTITNO PODRUČJE

Član 3.

(Uspostavljanje zone zaštite)

- (1) Zone sanitarne zaštite izvorista bunara B-1 Coca-Cola utvrđene su u skladu sa članom 7. Pravilnika o uslovima za određivanje zona sanitarne zaštite i zaštitnih mjera za izvorista voda koja se koriste ili se planiraju koristiti za piće ("Službene novine Federacije BiH", broj 51/02) (u daljem tekstu: Pravilnik) koja se odnose na izvorista podzemnih voda u izdanima intergranulame poroznosti. Prema stupnju opasnosti od zagađenja i drugih štetnih uticaja koji mogu nepovoljno djelovati na zdravstvenu ispravnost vode ili na izdašnost izvorista bunara B-1 Coca-Cola, uspostavljaju se tri zaštitne zone:
 1. Prva zaštitna zona (zona izvorista) - zona najstrožijeg režima zaštite,
 2. Druga zaštitna zona - zona ograničenog režima zaštite,
 3. Treća zaštitna zona - zona blagog režima zaštite
 Zaštitne zone izvorista bunara B-1 Coca-Cola prikazane su na karti mjerila 1:5.000, a prve i druge zaštitne zone izvorista na situacionom planu mjerila 1: 1.000 (prilog br. 6 i 7.).
- (2) U zoni iz prethodnog stava ovog člana primjenjuju se sanitarno - tehničke mjere i druga djelatnost na način utvrđen ovom Odlukom.

III. OBUHVAT I GRANICE ZAŠTITNIH ZONA

1. Prva zaštitna zona

Član 4.

(Granice prve zaštitne zone)

- (1) Granica prve zaštitne zone izvorista bunara B-1 Coca-Cola određena je u skladu sa članom 8. Pravilnika u kojem je propisano da ukoliko nije moguće da granica prve zone zaštite bude udaljena najmanje 50 m od vodozahvatnog objekta, tada ista može biti udaljena najmanje 10 m od vodozahvata pod uslovom da se istražnim radovima i proračunima utvrdi da neće doći do direktnog zagađenja izvorista. S obzirom da je istražnim radovima i proračunima utvrđeno da nema direktnog bakteriološkog zagađenja bunara B-1 granica prve zaštitne zone izvorista bunara B-1 Coca-Cola je određena na udaljenosti najmanje 10 m od bunara B-1 (stav 2. član 8. Pravilnika.)



SLUŽBENE NOVINE KANTONA SARAJEVO

Godina XX – Broj 51

Srijeda, 30. decembra 2015. godine
SARAJEVO

ISSN 1512-7052

KANTON SARAJEVO

Skupština Kantona Sarajevo

Na osnovu člana 18. tačka m) Ustava Kantona Sarajevo ("Službene novine Kantona Sarajevo", br. 1/96, 2/96, 16/97, 14/00, 4/01 i 28/04), člana 6. Zakona o imovini Kantona Sarajevo ("Službene novine Kantona Sarajevo", br. 6/97, 9/98 i 5/10), Skupština Kantona Sarajevo, na sjednici održanoj dana 21.12.2015. godine, donijela je

ODLUKU

**O DAVANJU SAGLASNOSTI NA OSNIVANJE PRAVA
GRAĐENJA NA NEKRETNOSTIMA U VLASNIŠTVU
KANTONA SARAJEVO NA KOJIMA JE KAO NOSILAC
PRAVA RASPOLAGANJA UPISAN KJKP "GRADSKI
SAOBRAČAJ" D.O.O. SARAJEVO I TO U KORIST
GRADA SARAJEVA, SVE U CILJU REALIZACIJE
PROJEKTA "REVITALIZACIJA
TREBEVIČKE ŽIČARE"**

I

Daje se saglasnost na osnivanje prava građenja na nekretnostima u vlasništvu Kantona Sarajevo na kojima je kao nosilac prava raspolaganja upisan KJKP "Gradski saobraćaj" d.o.o. Sarajevo i to u korist Grada Sarajeva, sve u cilju realizacije projekta "Revitalizacija Trebevičke žičare".

II

Daje se saglasnost KJKP "Gradski saobraćaj" d.o.o. Sarajevo da zaključi Ugovor o osnivanju prava građenja na nekretnostima u vlasništvu Kantona Sarajevo na kojima je kao nosilac prava raspolaganja upisan KJKP "Gradski saobraćaj" d.o.o. Sarajevo i to u korist Grada Sarajeva u cilju realizacije projekta iz tačke I ove Odluke".

III

Daje se saglasnost na Sporazum o definisanju elemenata za zaključivanje Ugovora o osnivanju prava građenja, zaključen između Grada Sarajeva, KJKP "Gradski saobraćaj" d.o.o. Sarajevo i Kantona Sarajevo-Ministarstvo saobraćaja Kantona Sarajevo, te se ovlašćuje Generalni direktor KJKP "Gradski saobraćaj" d.o.o. Sarajevo da može potpisati ugovor o osnivanju prava građenja pod uslovima iz tačke II ove Odluke.

IV

Daje se saglasnost na Odluku Nadzornog odbora KJKP "Gradski saobraćaj" d.o.o. Sarajevo broj 02/123 od 04.11.2015.

godine o odobravanju zaključivanja Ugovora o osnivanju prava na građenje.

V

Ugovor iz tačke II Odluke zaključit će se pod sljedećim uslovima:

- Pravo građenja zasniva se na rok od 25 godina od dana upisa u Zemljišne knjige Općinskog suda u Sarajevu i prestaje sa istekom roka za koji je osnovan;
- Nosilac prava građenja u periodu trajanja prava građenja neće plaćati mjesečnu naknadu za zemljište vlasniku zemljišta;
- Nakon prestanka prava građenja pravo vlasništva na izgrađenim objektima isključivo prelazi na KJKP "Gradski saobraćaj" d.o.o. Sarajevo, bez potraživanja naknade za uvećanu vrijednost nekretnine;
- I pod drugim uslovima iz Sporazuma o definisanju elemenata za zaključivanje Ugovora o osnivanju prava građenja koji su potpisali Kanton Sarajevo, Grad Sarajevo i KJKP "Gradski saobraćaj" d.o.o. Sarajevo.

VI

Ova Odluka stupa na snagu danom donošenja, a objavit će se u "Službenim novinama Kantona Sarajevo".

Broj 01-05-32672/15 Predsjedateljica
21. decembra 2015. godine Skupštine Kantona Sarajevo
Sarajevo Prof. Ana Babić, s. r.

Na osnovu člana 18. stav 1. tačka b. Ustava Kantona Sarajevo ("Službene novine Kantona Sarajevo", br. 1/96, 2/96, 3/96, 16/97, 14/00, 4/01, 28/04 i 6/13) i čl. 147. stav 5. i 170. stav 3. Zakona o prostornom uređenju ("Službene novine Kantona Sarajevo", broj 7/05), Skupština Kantona Sarajevo, na sjednici održanoj dana 21.12.2015. godine, donijela je

ODLUKU

**O IZMJENAMA I DOPUNAMA ODLUKE O
LEGALIZACIJI GRAĐEVINA IZGRAĐENIH BEZ
ODOBRENJA ZA GRAĐENJE I GRAĐEVINA
PRIVREMENOG KARAKTERA**

Član 1.

U Odluci o legalizaciji građevina izgrađenih bez odobrenja za građenje i građevina privremenog karaktera ("Službene novine Kantona Sarajevo", br. 6/06, 18/07, 18/08 i 35/12), član 4. mijenja se i glasi:

"Član 4.

Gradvine čija je izgradnja započeta do 31.12.2015. godine na koje se ne mogu primijeniti odredbe člana 3. ove Odluke rješavat će se po odredbama Zakona, uz obaveznu plaćanja posebne naknade.

Za započete radove plaća se posebna naknada na način utvrđen u članu 20. ove Odluke."

Član 2.

U članu 7. stav 1. mijenja se i glasi:

"Po ovoj Odluci vrši se legalizacija građevina iz čl. 3., 5. i 6. Odluke koje su izgrađene do 31.12.2015. godine."

Član 3.

Član 10. mijenja se i glasi:

"Član 10.

Zahijev za donošenje rješenja o naknadnoj urbanističkoj saglasnosti prema odredbama ove odluke iz čl. 3., 5. i 6. ove Odluke može se podnijeti do 31.01.2016. godine."

Član 4.

U članu 18. u stavu 3. alineja 3. mijenja se i glasi:

"- izradu planova prostornog uređenja"

Član 5.

Iza člana 18. dodaje se novi član 18.a koji glasi:

"Član 18.a

Plaćanje posebne naknade vrši se na osnovu rješenja kojim se utvrđuje iznos naknade i način njenog plaćanja.

Plaćanje posebne naknade može se vršiti u cjelokupnom iznosu ili najviše u 24 jednake mjesečne rate.

Izuzetno od odredbi člana 18. stav 4. ove Odluke investitor, kome je utvrđeno plaćanje naknade u mjesečnim ratama, dužan je dokaz o plaćenom cjelokupnom iznosu posebne naknade dostaviti najkasnije uz zahtjev za izdavanje upotrebne dozvole."

Član 6.

Član 24. Odluke mijenja se i glasi:

"Član 24.

Postupak inspeksijskog nadzora i rušenja bespravne građevine sprovest će se u skladu sa važećim propisima.

Izuzetno od odredbi stava 1. ovog člana nadležna služba za inspeksijske poslove donijet će zaključak o dozvoli izvršenja rješenja o rušenju bespravno izgrađene građevine ukoliko:

1. ovlašteno lice ne podnese zahtjev za donošenje naknadnog rješenja u roku do 31.01.2016. godine.
2. zahtjev bude odbijen ili odbačen, a protiv njega nije uložena žalba ili pokrenut upravni spor odnosno kada po istom budu iskorištena sva redovna pravna sredstva.

Za bespravno sagrađene građevine za koje se utvrdi da su izgrađene na javnim površinama, trgovima, u zaštitnim infrastrukturnim pojasevima duž infrastrukturnih trasa i građevina i sl., nadležna služba za inspeksijske poslove provest će postupak inspeksijskog nadzora u cijelosti u skladu sa važećim propisima (uključujući donošenje rješenja o rušenju - uklanjanju kao i zaključku o rušenju - uklanjanju bespravno izgrađene građevine), neovisno da li je za takvu građevinu podnesen zahtjev za donošenje naknadnog rješenja.

Član 7.

Član 26. a. mijenja se i glasi:

"Član 26.a.

Blagovremenim se smatraju svi zahtjevi podneseni od dana stupanja na snagu Odluke ("Službene novine Kantona Sarajevo", br. 6/06, 18/07, 18/08 i 35/12) do 31.01.2016. godine."

Član 8.

Ova Odluka stupa na snagu osmog dana od dana objavljivanja u "Službenim novinama Kantona Sarajevo".

Broj 01-05-32673/15

21. decembra 2015. godine
Sarajevo

Predsjedateljica

Skupštine Kantona Sarajevo
Prof. Ana Babić, s. r.

Na osnovu člana 18. tačka m) Ustava Kantona Sarajevo ("Službene novine Kantona Sarajevo", br. 1/96, 2/96, 3/96, 16/97, 14/00, 4/01, 28/04 i 6/13) te člana 26. stav (2) Zakona o zaštiti prava pripadnika nacionalnih manjina u Kantonu Sarajevo ("Službene novine Kantona Sarajevo", broj 27/11), Skupština Kantona Sarajevo, na sjednici održanoj dana 21.12.2015. godine, donijela je

ODLUKU

O IZMJENI ODLUKE O IMENOVANJU ČLANOVA
VIJEĆA NACIONALNIH MANJINA KANTONA
SARAJEVO

I

U Odluci o imenovanju Vijeća nacionalnih manjina Kantona Sarajevo ("Službene novine Kantona Sarajevo", br. 13/12, 29/12, 42/12, 45/13, 29/15 i 45/15) u tački III, alineja 8. mijenja se i glasi:

"8. Varan Hakan, predstavnik Turske nacionalne manjine,"

II

Ova odluka stupa na snagu osmog dana od dana objavljivanja u "Službenim novinama Kantona Sarajevo".

Broj 01-05-32674/15

21. decembra 2015. godine
Sarajevo

Predsjedateljica

Skupštine Kantona Sarajevo
Prof. Ana Babić, s. r.

Na osnovu člana 18. tačka b) Ustava Kantona Sarajevo ("Službene novine Kantona Sarajevo", br. 1/96, 2/96, 3/96, 16/97, 14/00, 4/01, 28/04 i 6/13), a u skladu sa članom 31. stav (2) Zakona o lovstvu ("Službene novine Federacije Bosne i Hercegovine" broj 4/06, 8/10 i 81/14) i članom 3. stav (1) Pravilnika o načinu određivanja i obilježavanja granica lovišta i postupku osnivanja lovišta u Federaciji Bosne i Hercegovine ("Službene novine Federacije BiH", broj 5/08), Skupština Kantona Sarajevo, na sjednici održanoj dana 21.12.2015. godine, donijela je

ODLUKU

O IZMJENAMA ODLUKE O OSNIVANJU LOVIŠTA NA
PODRUČJU KANTONA SARAJEVO

Član 1.

(Izmjena tačke d) člana 6.)

U Odluci o osnivanju lovišta na području Kantona Sarajevo ("Službene novine Kantona Sarajevo" br. 17/10 i 42/12) u članu 6. u stavu (1) tačka d) mijenja se i glasi:

"d) Površina lovišta: 9.108,20 ha".

Stav (3) briše se.

Dosadašnji stav (4), postaje stav (3).

Član 2.

(Izmjena tačke d) člana 10.)

(1) U članu 10. u stavu (1) tačka d) mijenja se i glasi:

"d) Površina lovišta: 12.627,7 ha".

(2) Stav (2) mijenja se i glasi:

"(2) Granica lovišta "Bukovik" polazi sa tromede administrativnih granica Općine Ilijaš, Općine Stari Grad i granice između Entiteta utvrđenom Dejtonskim mirovnim sporazumom južno od kote "Karaula" (1394), te u pravcu jugozapada ide granicom Entiteta sve do trase uskotračne pruge (Bistrik - Pale) gdje mijenja smjer i u pravcu sjeverozapada ide trasom pruge odnosno granicom Zaštićenog pejzaža "Trebević" (opisanom Zakonom o proglašenju zaštićenog pejzaža "Trebević" "Službene novine Kantona Sarajevo"



Broj: 09-02-57071/25
Sarajevo, 16.12.2025. godine

KANTON SARAJEVO
MINISTARSTVO KOMUNALNE PRIVREDE, INFRASTRUKTURE, PROSTORNOG
UREĐENJA, GRAĐENJA I ZAŠTITE OKOLIŠA

PREDMET: Mišljenje na prijedlog Zakona o usmjeravanju sredstava za pomoć u sanaciji klizišta prikupljenih po osnovu posebne naknade.-

Na osnovu člana 3. stav (1) tačka b) Uredbe o osnivanju Ureda za zakonodavstvo Vlade Kantona Sarajevo ("Službene novine Kantona Sarajevo", broj 20/23) i člana 4. Uredbe o postupku i načinu pripremanja, izrade i dostavljanja propisa ("Službene novine Kantona Sarajevo", broj 50/17-Drugi novi prečišćeni tekst, 2/18-Ispravka i 32/22), Ured za zakonodavstvo Vlade Kantona Sarajevo, daje sljedeće

M I Š L J E N J E

Ured za zakonodavstvo Vlade Kantona Sarajevo (u daljem tekstu: Ured) je na prijedlog Zakona o usmjeravanju sredstava za pomoć u sanaciji klizišta prikupljenih po osnovu posebne naknade (u daljem tekstu: Zakon) dao mišljenje, broj: 09-02-52031/25 od 05.11.2025. godine.

S obzirom da je dana 16.12.2025. godine Uredu dostavljen akt Ministarstva komunalne privrede, infrastrukture, prostornog uređenja, građenja i zaštite okoliša Kantona Sarajevo, broj: 05-02-51321-5/25 od 16.12.2025. godine, kojim se dostavlja na mišljenje prijedlog Zakona, Ured konstatuje da ostaje pri mišljenju, broj: 09-02-52031/25 od 05.11.2025. godine i daje sljedeće mišljenje:

1. Skupština Kantona Sarajevo je na osnovu člana 18. tačka b) Ustava Kantona Sarajevo ("Službene novine Kantona Sarajevo", br. 1/96, 2/96, 3/96, 16/97, 14/00, 4/01 i 28/04) i čl. 147. stav (5) i 170. stav (3) Zakona o prostornom uređenju ("Službene novine Kantona Sarajevo", broj 7/05) donijela Odluku o legalizaciji građevina izgrađenih bez odobrenja za građenje i građevina privremenog karaktera („Službene novine Kantona Sarajevo“, br. 6/06, 18/07, 18/08, 35/12 i 51/15), gdje je u članu 18. propisano da se sredstva prikupljena iz posebnih naknada usmjeravaju prema Programu koji usvaja Vlada Kantona Sarajevo, po prethodno pribavljenim mišljenjima općinskih načelnika, za sljedeće namjene: zaštitu izvorišta vode za piće, sanacije klizišta na području Kantona Sarajevo, izradu planova prostornog uređenja i troškove provođenja ove Odluke.

Zakon o prostornom uređenju Kantona Sarajevo ("Službene novine Kantona Sarajevo", br. 24/17 i 1/18) donesen je na osnovu člana 12. tačka f) Ustava Kantona Sarajevo ("Službene novine Kantona Sarajevo", br. 1/96, 2/96 - Ispravka, 3/96 - Ispravka, 16/97, 14/00, 4/01, 28/04, 6/13 i

31/17), koji je u članu 182. propisao prestanak važenja Zakona o prostornom uređenju ("Službene novine Kantona Sarajevo", broj 7/05).

Nadalje, član 178a. Zakona o prostornom uređenju Kantona Sarajevo ("Službene novine Kantona Sarajevo", br. 24/17 i 1/18) propisao je da će se izuzetno od odredbi člana 178. ovog Zakona zahtjevi za legalizaciju građevina koji su podneseni u rokovima predviđenim Uputstvom o uvjetima i načinu legalizacije objekata individualne stambene izgradnje građenih bez odobrenja za građenje izdatog od strane nadležnog organa uprave broj: 05-36-80/98 od 15.07.1998. godine, Uredbom o postupku i uvjetima za legalizaciju građevina izgrađenih bez građevinske dozvole ("Službene novine Kantona Sarajevo", br. 10/01 i 14/02) i Odlukom o legalizaciji građevina izgrađenih bez odobrenja za građenje i građevina privremenog karaktera ("Službene novine Kantona Sarajevo", br. 6/06, 18/07, 18/08, 35/12 i 51/15) nastaviti rješavati po postupku predviđenom navedenim propisima izuzev ako to nije u suprotnosti sa Zakonom o građevinskom zemljištu Federacije Bosne i Hercegovine ("Službene novine Federacije BiH", br. 25/03 i 67/05).

Vlada Kantona Sarajevo je dana 18.09.2025. godine donijela Zaključak, broj: 02-04-46444-23/25, kojim je utvrdila raspodjelu i usmjeravanje sredstava, koja su do tog datuma prikupljena i koja će biti prikupljena po osnovu posebne naknade za legalizaciju građevina izgrađenih bez odobrenja za građenje i građevina privremenog karaktera na račun Zavoda za izgradnju Kantona Sarajevo.

Prijedlogom Zakona uređuju se pitanja namjene i načina usmjeravanja sredstava posebne naknade prikupljenih po osnovu Odluke o legalizaciji građevina izgrađenih bez odobrenja za građenje i građevina privremenog karaktera, koja su već ranije uređena navedenom Odlukom, te Zaključkom Vlade Kantona Sarajevo.

Imajući u vidu činjenicu da se zakonima definišu opća pitanja i da se ista razrađuju podzakonskim propisima, kao i odlukama, gdje se pojedinačna pitanja definisana podzakonskim propisima, kao i odlukama, ne razrađuju zakonima, te da sva pravila i izuzeci trebaju biti sadržani u zakonima, a ne u podzakonskim propisima ili drugim aktima, predložena forma propisa u vidu zakona, predmeta koji se reguliše istim i predložena pravna rješenja sadržana u prijedlogu Zakona, kao i procjena opravdanosti razloga za donošenje navedenog propisa u isključivoj je nadležnosti Vlade odnosno Skupštine Kantona Sarajevo.

2. Dostavljeni materijal je pripremljen u skladu sa Uredbom o postupku i načinu pripremanja, izrade i dostavljanja propisa ("Službene novine Kantona Sarajevo", broj: 50/17- Drugi novi prečišćeni tekst, 2/18- Ispravka i 32/22), te se isti može razmatrati na jednoj od narednih sjednica Vlade Kantona Sarajevo, uz napomenu da se predmetni materijal dopuni sa mišljenjem Ministarstva finansija Kantona Sarajevo u pogledu korištenja i namjene sredstava posebne naknade definisanih prijedlogom Zakona, te ulaganja sredstava u imovinu izvan područja Kantona Sarajevo, kao i Pravobranilaštva Kantona Sarajevo po pitanju zaštite imovine Kantona Sarajevo, obzirom da se odredbama prijedloga Zakona definiše djelovanje Kantona Sarajevo izvan teritorijalnog područja nadležnosti.

Dostaviti:

1. Naslovu
2. Evidencija
3. Arhiva



UREDA

Hamida Dizdara

Adresa: Hamida Dizdara

Tel: + 387(0)33 560-449, Fax: + 387 (0) 33 560-448

Web: <http://vlada.ks.gov.ba>, E-mail: uz@vlada.ks.gov.ba



Bosnia and Herzegovina
Federation of Bosnia and Herzegovina
CANTON SARAJEVO
Ministry of Justice and Administration

Broj: 03-04/2-02-57073/25
Sarajevo, 17.12.2025. godine

**MINISTARSTVO KOMUNALNE PRIVREDE,
INFRASTRUKTURE, PROSTORNOG UREĐENJA,
GRADENJA I ZAŠTITE OKOLIŠA**
gosp. Mladen Pandurević, ministar

**PREDMET: Prijedlog Zakona o usmjeravanju sredstava za pomoć u sanaciji
klizišta prikupljenih po osnovu posebne naknade, mišljenje -**
VEZA: Vaš akt, broj: 05-02-51321-4/25 od 16.12.2025. godine

Postupajući po Vašem aktu, broj i datum veze, na osnovu člana 7. Zakona o ministarstvima i drugim organima uprave Kantona Sarajevo ("Službene novine Kantona Sarajevo", broj 40/22) i člana 4. stav 6. Uredbe o postupku i načinu pripremanja, izrade i dostavljanja propisa ("Službene novine Kantona Sarajevo", broj 50/17 – Drugi novi prečišćeni tekst, 2/18 – Ispravka i 32/22), Ministarstvo pravde i uprave razmotrilo je dostavljeni prijedlog Zakona i daje slijedeće

MIŠLJENJE

Prijedlog Zakona o usmjeravanju sredstava za pomoć u sanaciji klizišta prikupljenih po osnovu posebne naknade je propis kojim se ne povrjeđuju prava i slobode zaštićene odredbama Evropske konvencije o zaštiti ljudskih prava i osnovnih sloboda, niti je u suprotnosti sa drugim pravnim aktima kojima je utvrđena zaštita ljudskih prava i sloboda.

S poštovanjem,

Dostaviti:
1. Naslovu;
2. a/a.

MINISTARSTVO
Darja Softić Kadenić



Bosnia and Herzegovina
Federation of Bosnia and Herzegovina

CANTON SARAJEVO
Ministry of Finance

Broj: 08/03-02-57074/25 NB
Sarajevo, 17.12.2025. godine

KANTON SARAJEVO
MINISTARSTVO KOMUNALNE PRIVREDE, INFRASTRUKTURE,
PROSTORNOG UREĐENJA, GRAĐENJA I ZAŠTITE OKOLIŠA

Predmet: Mišljenje na Prijedlog zakona o usmjeravanju sredstava za pomoć u sanaciji klizišta prikupljenih po osnovu posebne naknade

Veza: Vaš dopis br.: 05-02-51321-6/25 od 16.12.2025. godine.

Vezano za Vaš zahtjev za mišljenje na Prijedlog zakona o usmjeravanju sredstava za pomoć u sanaciji klizišta prikupljenih po osnovu posebne naknade, u skladu sa članom 8. Pravilnika o proceduri za izradu izjave o fiskalnoj procjeni zakona, drugih propisa i akata planiranja na budžet („Službene novine Federacije BiH“, br. 34/16 i 15/18), dajemo sljedeće mišljenje:

Ministarstvo komunalne privrede, infrastrukture, prostornog uređenja, građenja i zaštite okoliša Kantona Sarajevo je postupilo u skladu sa navedenim Pravilnikom i Ministarstvu finansija uz Prijedlog zakona, dostavili na mišljenje popunjen i potpisan obrazac IFP-NE u kojem je data sljedeća izjava: „Za implementaciju ovog Zakona nisu potrebna dodatna sredstva u Budžetu Kantona Sarajevo za 2025. godinu“.

Obzirom da za provođenje Prijedlog zakona nisu potrebna dodatna sredstva iz Budžeta Kantona Sarajevo, na navedeni Prijedlog zakona o usmjeravanju sredstava za pomoć u sanaciji klizišta prikupljenih po osnovu posebne naknade, za 2025. godinu nema primjedbi. U izjavi o fiskalnoj procjeni uticaja propisa, od strane predlagača, nisu navedeni podaci o uticaju propisa za naredne budžetske godine.

Ovo mišljenje je dato u skladu sa odredbama Prijedloga zakona koji se obrađuju i podataka navedenih u Obrascu IFP-NE Izjave o fiskalnoj procjeni, čija tačnost je u isključivoj odgovornosti Predlagača, te ukoliko se naknadno utvrdi da navedene odredbe i podaci odstupaju od stvarno činjeničnog stanja, ovo mišljenje će se staviti van snage.

MINISTAR


Dr. Afan Kalamujić

Dostaviti:

1. Naslovu
2. MF – Sektor za budžet i fiskalni sistem
3. a/a

Pripremio:

Kontrolisao:



OBRAZAC IZJAVA O FISKALNOJ PROCJENI										Obrazac IFP NE			
A 1. Obradivač propisa			KOD		NAZIV								
Razdjel			33010001		MINISTARSTVO KOMUNALNE PRIVREDE, INFRASTRUKTURE, PROSTORNOG UREĐENJA, GRAĐENJA I ZAŠTITE OKOLIŠA KANTONA SARAJEVO								
B 2. Osnovni podaci o prijedlogu propisa													
Vrsta propisa/akta			Zakon		DA		Odluka		NE		Strategija		
			Uredba		NE		Drugi akti		NE		Drugi akti planiranja		
Naziv propisa/akta			ZAKON O USMJERAVANJU SREDSTAVA ZA POMOĆ U SANACIJI KLIZIŠTA PO OSNOVU POSEBNE NAKNADE									NE	
C 3. Izjava o nepostojanju dodatnih fiskalnih efekata predloženog propisa													
Za implementaciju ovog Zakona nisu potrebna dodatna sredstva u Budžetu Kantona Sarajevo za 2025. godinu.													
D 4. Pečat i potpis odgovornog lica obrađivača, odnosno predlagача propisa			MINISTAR Mladen Pandurević					Mjesto i datum		29.10.2025. godina			

VII - AKTA VLADE KANTONA

Član 26.

Vlada Kantona u ostvarivanju svojih nadležnosti utvrđenih ustavom donosi uredbе, odluke, rješenja i zaključke.

Član 27.

Izuzetno za vrijeme trajanja ratnog stanja ili neposredne ratne opasnosti kada postoji objektivna nemogućnost da se sazove Skupština Kantona, Vlada može donositi i propise iz nadležnosti Skupštine Kantona.

Propisima iz stava 1. ovog člana ne mogu se staviti van snage prava i slobode utvrđene ustavom i drugim propisima.

Propise iz stava 1. ovog člana Vlada će dostaviti Skupštini na potvrdu čim ona bude u mogućnosti da se sastane.

Član 28.

Uredbom se uređuju najvažnija pitanja iz nadležnosti Vlade Kantona, bliže uređuju odnosi za provođenje zakona, obrazuju stručne i druge službe Vlade Kantona i utvrđuju načela za unutrašnju organizaciju organa uprave Kantona.

Odlukom se uređuju pojedina pitanja ili propisuju mjere Vlade Kantona, daje saglasnost ili potvrđuju akta drugih organa ili organizacija i odlučuje o drugim pitanjima o kojima se ne odlučuje uredbom.

Rješenjem se odlučuje o imenovanjima i razrješenjima, kao i o drugim pojedinačnim pitanjima iz nadležnosti Vlade Kantona.

Zaključkom se utvrđuju stavovi o pitanjima od značaja za provođenje utvrđene politike, uređuju unutrašnji odnosi u Vladi Kantona i određuju zadaci organima uprave i službama, kao i radnim tijelima Vlade Kantona. Zaključkom se odlučuje i u drugim slučajevima u kojima se ne donose druga akta.

Član 29.

Uredbe i odluke Vlade Kantona objavljuju se u "Službenim novinama Kantona Sarajevo", a ostali akti Vlade ako je to u njima navedeno.

VIII - JAVNOST RADA VLADE KANTONA

Član 30.

Javnost rada Vlade Kantona obezbjeđuje se u skladu sa zakonom kojim se reguliše sloboda pristupa informacijama u Federaciji Bosne i Hercegovine.

IX - STRUČNE I DRUGE SLUŽBE KANTONA

Član 31.

Za obavljanje stručnih i drugih poslova za potrebe Skupštine Kantona, Vlade Kantona i organe uprave, Vlada Kantona može osnivati određene stručne, tehničke i druge službe, kao zajedničke ili samostalne službe, u skladu sa zakonom.

Aktom o obrazovanju službe iz prethodnog stava, utvrđuje se njen djelokrug, kao i status i odgovornost te službe i lica koje njom rukovodi.

Član 32.

Vlada Kantona vrši nadzor nad radom stručnih službi koje obrazuje.

Sekretar Vlade Kantona rukovodi radom Stručne službe koja obavlja poslove za potrebe Vlade Kantona i odgovoran je za njen rad.

X - PRELAZNE I ZAVRŠNE ODREDBE

Član 33.

Vlada Kantona je dužna donijeti Poslovnik o svom radu u roku od 30 dana od svog konstituisanja.

Član 34.

Vlada Kantona Sarajevo dužna je uskladiti Poslovnik o radu sa odredbama Zakona o izmjenama i dopunama Zakona o Vladi Kantona Sarajevo ("Službene novine Kantona Sarajevo", broj 38/13), u roku od 30 dana od dana njegovog stupanja na snagu.

Član 35.

Poslovnik Izvršnog odbora Grada Sarajeva i drugi propisi koji se odnose na njegovo unutrašnje organizovanje i funkcionisanje, koji su na snazi na dan stupanja na snagu Zakona o Vladi Kantona Sarajevo ("Službene novine Kantona Sarajevo", broj 7/96), ukoliko nisu u suprotnosti sa Ustavom Kantona i ovim zakonom, primjenjivaće se kao propisi Vlade, dok se ne donese Poslovnik o radu Vlade Kantona.

Član 36.

Do imenovanja premijera i članova Vlade u skladu sa Zakonom o izmjenama i dopunama Zakona o Vladi Kantona Sarajevo ("Službene novine Kantona Sarajevo", broj 4/01), poslove iz nadležnosti Vlade vršit će Vlada u dosadašnjem sastavu.

Član 37.

Ovlašćuje se Zakonodavno-pravna komisija Skupštine Kantona Sarajevo da utvrdi Novi prečišćeni tekst Zakona o Vladi Kantona Sarajevo.

Član 38.

Zakon o izmjenama i dopunama Zakona o Vladi Kantona Sarajevo stupio je na snagu osmog dana od dana objavljivanja u "Službenim novinama Kantona Sarajevo", broj 38/13.

Na osnovu člana 16. Zakona o izmjenama i dopunama Zakona o sudskim taksama ("Službene novine Kantona Sarajevo", broj 18/14) i člana 181. Poslovnika Skupštine Kantona Sarajevo ("Službene novine Kantona Sarajevo", broj 41/12 - Drugi novi prečišćeni tekst i br. 15/13 i 47/13), Zakonodavno - pravna komisija Skupštine Kantona Sarajevo, na sjednici 22.08.2014. godine, utvrdila je Prečišćeni tekst Zakona o sudskim taksama.

Prečišćeni tekst Zakona o sudskim taksama obuhvata: Zakon o sudskim taksama ("Službene novine Kantona Sarajevo", broj 21/09), Zakon o izmjenama i dopunama Zakona o sudskim taksama ("Službene novine Kantona Sarajevo", broj 29/09), Zakon o izmjeni Zakona o sudskim taksama ("Službene novine Kantona Sarajevo", broj 14/11), Zakon o izmjenama Zakona o sudskim taksama ("Službene novine Kantona Sarajevo", broj 36/13) i Zakon o izmjenama i dopunama Zakona o sudskim taksama ("Službene novine Kantona Sarajevo", broj 18/14), u kojim je naznačen dan stupanja na snagu tih zakona.

Broj 01-05.22971-2/14

22. augusta 2014. godine
Sarajevo

Po ovlaštenju
Esad Hrvačić, s. r.

ZAKON

O SUDSKIM TAKSAMAMA
(Prečišćeni tekst)

DIO PRVI. OPĆE ODREDBE

Član 1.

(Plaćanje sudske takse)

- (1) Ovim zakonom utvrđuje se način plaćanja sudskih taksa (u daljnjem tekstu: takse) u postupku pred Kantonalnim sudom u Sarajevu i Općinskim sudom u Sarajevu (u daljnjem tekstu: sud).
- (2) Postupci u kojima se plaća taksa i visina takse za pojedine radnje, utvrđeni su u Tarifi sudskih taksi, koja je sastavni dio ovog zakona.

Član 2.

(Obveznik plaćanja takse)

- (1) Takse propisane ovim zakonom plaća lice po čijem zahtjevu ili u čijem interesu se preduzimaju radnje u postupku, za koje je ovim zakonom utvrđeno plaćanje takse (u daljnjem tekstu: takseni obveznik).
- (2) Za podneske i zapisnike koji zaničaju podneske i takse je dužno da plati lice koje podnosi podneske i lica na čiji zahtjev

- d) komunikacijska i transportna infrastruktura;
- e) socijalna politika;
- f) provođenje zakona i drugih propisa o državljanstvu;
- g) imigracija i azil;
- h) turizam;
- i) korištenje prirodnih bogatstava.

Član 14.

Vršenje nadle nosti

Svoje nadle nosti Kanton izvršava donošenjem sopstvenih propisa i primjenom propisa Bosne i Hercegovine i Federacije.

Nadle nosti iz člana 13. ovog Ustava Kanton vrši u obimu dogovorenom sa federalnim vlastima. U slučaju da takav dogovor ne postoji te nadle nosti će Kanton vršiti cjelovito i samostalno.

Član 15.

Prenošenje nadle nosti

Svoje nadle nosti iz oblasti obrazovanja, kulture, turizma, lokalnog poslovanja i dobrotvornih aktivnosti, radija i televizije Kanton može prenositi na općine u svom sastavu. Ove nadle nosti će se obavezno prenositi na one općine u kojima većinsko stanovništvo prema nacionalnoj strukturi nije stanovništvo koje čini većinu i na području cijelog Kantona.

Kanton može neke od svojih nadle nosti prenijeti i na federalne vlasti, ukoliko bi se na taj način obezbijedilo njihovo efikasnije i racionalnije vršenje.

Odluku o prenošenju nadle nosti u smislu ovog člana donosi Skupština.

IV - STRUKTURA VLASTI

A) ZAKONODAVNA VLAST

Član 16.

Opća odredba

Zakonodavnu vlast u Kantonu vrši Skupština Kantona.

Član 17.

Sastav Skupštine

Skupština je jednodomno predstavničko tijelo sastavljeno od 45 (četrdesetpet) poslanika. Poslanici se biraju tajnim glasanjem na neposrednim izborima na cijelom području Kantona.

Prilikom izbora poslanika obezbjeđuje se odgovarajuća zastupljenost predstavnika Bošnjaka, Hrvata i ostalih naroda proporcionalno nacionalnoj strukturi stanovništva na području Kantona.

Izbor poslanika u Skupštini provodi se sukladno federalnim izbornim propisima, s tim što izbore raspisuje i provodi Skupština.

Mandat poslanika u Skupštini traje 2 (dvije) godine.

Član 18.

Nadle nosti Skupštine

Skupština Kantona:

- a) priprema i dvotrećinskom većinom usvaja Ustav Kantona;
- b) donosi zakone i druge propise u okviru izvršavanja nadle nosti Kantona, izuzev propisa koji su ovim Ustavom ili zakonom dati u nadle nost Vlade Kantona;
- c) bira i razrješava Predsjednika i podpredsjednika Kantona sukladno Ustavu Federacije i ovom Ustavu;
- d) utvrđuje politiku i donosi programe razvoja Kantona;
- e) potvrđuje imenovanje Premijera, zamjenika Premijera i članova Vlade Kantona;
- f) osniva kantonalne i općinske sudove i utvrđuje njihove nadle nosti;
- g) bira sudije kantonalnih sudova sukladno Ustavu Federacije i ovom Ustavu;
- h) usvaja budžet Kantona i donosi zakone o oporezivanju i na drugi način osigurava potrebno finansiranje;
- i) bira zastupnike u Dom naroda Federacije sukladno Ustavu Federacije;
- j) odlučuje o prijenosu ovlaštenja Kantona na općine i Federaciju;
- k) odobrava zaključivanje ugovora i sporazuma u oblasti međunarodnih odnosa i međunarodne suradnje;
- l) provodi istragu sukladno ovom Ustavu i posebnim propisima;
- m) vrši i druge poslove utvrđene federalnim propisima, ovim Ustavom i kantonalnim propisima.

Član 19.

Način rada Skupštine

Skupština bira predsjedavajućeg i dva njegova zamjenika iz reda izabranih poslanika.

Skupština zasijeda javno, izuzev u slučajevima kada je to predviđeno njenim poslovníkom. Izvještaji o zasjedanjima i donesenim odlukama se objavljuju u sredstvima javnog informiranja.

Način rada Skupštine bli e se uređuje poslovníkom.

Član 20.

Poslanički imunitet

Krivični postupak ili građanska parnica ne mogu biti pokrenuti protiv kantonalnog poslanika, niti kantonalni poslanik može biti zadržan u pritvoru ili kažnjen na bilo koji način zbog iznesenog mišljenja i datog glasa u Skupštini.

Član 21.

Način odlučivanja u Skupštini

U vršenju svojih nadle nosti Skupština donosi zakone, druge propise, te opće i pojedinačne akte (dalje: propisi).



SLUŽBENE NOVINE
KANTONA SARAJEVO

Petak, 21. septembra 2012.

Broj 41 – Strana 27

Predsjedavajući zaprimljene amandmane dostavlja predlagачu koji je obavezan u roku od 5 dana od dana dostavljanja amandmana da se očituje u pisanoj formi i očitovanje dostavi predsjedavajućem.

Član 153.

Na amandman predlagачa zakona svaki poslanik/zastupnik može podnijeti amandman do zaključenja pretresa.

Kada se amandmanom mijenjaju načela na kojim se zasniva zakon ili se angažuju značajnija materijalna sredstva, na prijedlog 10 poslanika/zastupnika, Zakonodavno-pravne komisije, nadležnog ili drugog radnog tijela Skupštine, Skupština može odlučiti da se odloži rasprava radi zauzimanja stavova u klubovima poslanika/zastupnika.

Član 154.

Ukoliko se amandmanom bitnije mijenja tekst prijedloga zakona, o amandmanu se ne može odlučiti prije nego što se o njemu ne izjasne nadležna radna tijela Skupštine, Zakonodavno-pravna komisija i Vlada.

Član 155.

Ako amandman na prijedlog zakona sadrži odredbe kojima se angažuju finansijska sredstva, predsjedavajući Skupštine dostavlja amandman i nadležnom kantonalnom organu u čiji djelokrug spadaju pitanja obezbjeđenja sredstava i raspolaganja sredstvima da razmotri uticaj odredaba amandmana na raspoloživa sredstva i na obezbjeđenje sredstava za finansiranje predloženog rješenja i da o tome izvjesti Skupštinu.

Član 156.

Povodom amandmana na prijedlog zakona podnesenog u toku pretresa, Skupština može odlučiti da se pretres prekine da bi se o amandmanu izjasnila Vlada, nadležno radno tijelo, klubovi naroda i Zakonodavno-pravna komisija.

Član 157.

Podnosilac prijedloga zakona se izjašnjava o amandmanu. Vlada Kantona se izjašnjava o amandmanima i kada nije predlagач zakona.

Amandman podnosioca prijedloga zakona, kao i amandman drugog ovlaštenog predlagачa sa kojim se podnosilac prijedloga saglasio, postaje sastavni dio prijedloga zakona.

O amandmanu na prijedlog zakona sa kojim se nije saglasio predlagач, a podnosilac amandmana nije odustao od njega, Skupština glasa odvojeno.

- Donošenje zakona po skraćenom postupku

Član 158.

Kad je to programom rada Skupštine predviđeno ili kad nije u pitanju složen i obiman zakon, podnosilac prijedloga zakona može umjesto nacrtu da podnese prijedlog zakona i da predloži da se prijedlog zakona pretresa po skraćenom postupku bez nacrtu zakona.

Ako Skupština ne prihvati da pretresa prijedlog zakona po skraćenom postupku, sa prijedlogom zakona će se postupiti kao sa nacrtom i o tom nacrtu odmah se vrši rasprava.

- Donošenje zakona po hitnom postupku

Član 159.

Zakoni se, po pravilu, ne donose po hitnom postupku.

Izuzetno, po hitnom postupku može da se donese samo zakon kojim se uređuju odnosi i pitanja za čije uređivanje postoji neodložna potreba i ako bi donošenje zakona u redovnom postupku moglo da izazove štetne posljedice za društvene interese u Kantonu.

Član 160.

Prijedlog da se donese zakon po hitnom postupku, skupa sa prijedlogom tog zakona, može da podnese svaki poslanik/zastupnik, radno tijelo Skupštine ili Vlada, uz obrazloženje zašto je neophodno da se zakon donese po hitnom postupku.

Član 161.

O prijedlogu za donošenje zakona po hitnom postupku odlučuje Skupština kao o prethodnom pitanju na sjednici Skupštine prije utvrđivanja dnevnog reda.

O prijedlogu se vodi pretres, a Skupština može odlučiti da podnosilac prijedloga zakona ili njegov predstavnik na sjednici Skupštine usmeno navede razloge zbog kojih je potrebno da se zakon donese po hitnom postupku.

Ako prijedlog nije podnijela Vlada, Skupština će prije odlučivanja od nje zatražiti mišljenje o ovom prijedlogu.

Ako Skupština usvoji prijedlog za donošenje zakona po hitnom postupku, prijedlog zakona se unosi u dnevni red i o njemu se odlučuje na istoj sjednici Skupštine.

Ako Skupština ne prihvati razloge iz člana 159. stav 2. ovog poslovnika za donošenje zakona po hitnom postupku, o svom zaključku odmah obavještava podnosioca prijedloga zakona, te o njemu raspravlja kao o nacrtu.

Član 162.

Predsjedavajući Skupštine, kad primi prijedlog da se zakon donese po hitnom postupku, zatražiće od Zakonodavno-pravne komisije i odgovarajućeg radnog tijela da razmotre prijedlog zakona i podnesu Skupštini izvještaj.

Skupština može, kad utvrdi potrebu donošenja zakona po hitnom postupku ili u toku pretresa, da zatraži od Zakonodavno-pravne komisije i odgovarajućeg radnog tijela da razmotre prijedloge i podnesu odmah izvještaj o prijedlogu zakona.

Član 163.

Na prijedlog zakona koji se donosi po hitnom postupku mogu da se podnose amandmani do zaključenja pretresa.

Ako se amandmanom mijenjaju načela na kojima se zasniva prijedlog zakona, ili ako bi prihvatanje amandmana prouzrokovalo bitnu izmjenu teksta prijedloga zakona, ili ako se amandmanom angažuju finansijska sredstva, Skupština će odlučiti o amandmanu kad pribavi mišljenje Zakonodavno-pravne komisije i kad se o tom izjasni Vlada.

Zakonodavno-pravna komisija i druga nadležna tijela dužni su da odmah razmotre dostavljene amandmane i da podnesu Skupštini izvještaj sa mišljenjem i prijedlozima.

- Vršenje ispravki u zakonu, drugom propisu i općem aktu

Član 164.

Prijedlog za ispravku štamparskih grešaka u objavljenom tekstu zakona, drugih propisa i općih akata Skupštine podnosi kantonalni organ uprave koji je nadležan za staranje o izvršavanju tih akata ili ovlašten podnosilac prijedloga zakona, drugog propisa ili općeg akta.

Ispravke štamparskih grešaka u objavljenom tekstu zakona, drugog propisa ili općeg akta Skupštine, poslije sravnjivanja sa izvornikom zakona, drugog propisa ili općeg akta Skupštine, daje sekretar Skupštine.

